



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

BLA-i Balochistan nung army convoy ka amak

BNP Paribas Open: Draper aser Rune na final asayatsü



VOL. XXII ISSUE NO. 152 (ADOK 152)

DIMAPUR

TENTONÜ (MONDAY)

METSÜREMI (MARCH) 17, 2025

₹ 5.00

Ao kini tanü Dr. Senkalong mangyima amonger

Dimapur, March 16 (TYO) : America nung nüngtugu scientist Dr.Senkalong Yaden alima nungi pilaa aoba osang angashia Ao Senden aser Ao Kaketshir Mungdang na pronglai mangyim jashi lemsatepba osang sangdong balala nung metetdaksüogo.

Iba ama Aor chanu rongnungi US nung oagi nüngtugu Scientist kuma litetba tashitemeteter aser tesayur Dr.Senka Yaden nem aküm aser tetushi agüja March 17, 2025 anogo ya Ao kin mangyimba anogo asütsü ta Ao Sendeni metetdaksüogo.

Ano, tanga sangdong ka nung, AKM-ia alima rangben nem tajangzük agütsütettsüsa aser Science nisung ta ajatsüsa pei mapa nung meranga inyaka takok anguba tesayur, Dr. Senka Yaden bilemteta aser pa nem aküm tetushi agüja ola madoki sarasademba mapang ka Mokokhung district nung aliba kaketreju ajak nung March 17, 2025 anogo nung kadaktsüner ta mepishia metetdaksüogo.

“Dr. Senkalong Yaden ya ajemalu aser mangdang tulu akaba techira nisung ka liasü. Pa asüba ya kinungertem asoshi dang masü saka alima asoshi takoksa lir,” ta Ao Sendenisa metetdaksü.

“Dr. Senka Yadeni bendanga agüja shisaliok bushiba nung US nunga tangar ajateta nüngtugu kuma takok angubaji alima nung alirtem aser talisa Naga nung aser Ao kin asoshi tashi angudak nümadangtsü mapa tuluka liasü,” ta AKM-ia sangdong ka nung metetdaksüogo.

NNC (Parent Body)-i taoba Tir mang ayimer

Naga National Council (Parent Body)-i Naga National Council nung taoba Tir Dr. Senka Yaden asüba atema mangyimba metetdaksüogo.

"Asenoki lennir tajung aser tashir ka akoksaogo aser NNC (Parent Body) tenüng nung par

kinong den asükhu lemsateper. Pai Naga nung aser atema inyakba teti bilemtettsü aser ajak dang tematiba tangari tatishitsü süa litetba kodanga mamadoktsü. Tsüngremi pa tanüla teti atema anisüngzük ngudakjang ta sarasademer" ta General Secretary, Naga National Council (Parent Body) V. Nagi-i sangdong ka nung ashi.

"Dr. Senka ya United States of America nung nüngtugu scientist ka liasü. Pa ya ochishir ka aser America nung Naga nung asoshi tebu ka ama liyonga aruogo. Naga yimten lennirtem rongnunga pa ya tazüngtashir ka aser tematiba degree holder ka liasü" ta pai ashi.

Asür Dr. Senka Yaden ya tesüiba mapang tazünger kar adokba rongnung ka liasü. 16th May 1951 Naga National Voluntary Plebiscite (Political Referendum) nung Naga voters signatures atema maparen pai ketdangsüa inyak. Chedema Village nung Federal Government of Nagaland aser India sorkar tsüngda 1964 Cease-fire Talk nunga pa dena liasü ta V. Nagi-isa ashi.

1982 nung pai America nungi Nagaland semdangi arudang Kohima nung tongtipang shisaktokden ka ayonga agi. 1997 küm North American Baptist Association-i Atlanta Meet of Naga Reconciliation ayonga agidanga pa den külemi pa kinungtsü naprong aden.

2007 küm Mopungchuket, Ao Region nung NNC General Meeting alidang pa küm pungu kümsük atema Naga National Council Tir inyaktsü shimteta liasü ta V. Nagi-isa ashi.

Asür Dr. Senka Yaden-i Naga politics nung tongti shilem agiba den külemi America nunga scientific education aser research nung shilem tulu agiogo ta paisa ashi.

Amit Shah-i NE nung criminal laws 3 atema senden amen

Guwahati, March 16, 2025

(Agencies): Union Home Minister Amit Shah-i March 16, 2025 nü Guwahati nung senden ka nung northeast state tem nung criminal laws taen 3-Bharatiya Nagarik Suraksha Sanhita (BNSS), Bharatiya Nyaya Sanhita (BNS), aser Bharatiya Sakshya Adhiniyam (BSA) mapa tenzükba meyipa reprangshiogo.

Iba senden nung northeast nungi chief minister tem den police ketdangsürtem aden aser parnoki özüng tasentem dak

sendakba onüktem lemsatepa liasü.

Northeast state 7 nungi Chief minister tem den state pungu nungi Director General of Police (DGP) tem den state balala nungi Chief secretary tem senden nung aden. Tanü senden nung Mizoram, Arunachal Pradesh, aser Manipur nungi DGP tem maden.

State shiai Bharatiya Nagarik Suraksha Sanhita (BNSS), Bharatiya Nyaya Sanhita (BNS), aser Bharatiya Sakshya Adhiniyam (BSA) özüngtem

mapa kuma inyakba osangtem lemsatepa liasü.

State temi osang agütsüba sülen Amit Shah-i "New Criminal Laws: Standard Operating Procedures and Rules" ta ser kaket ka sayatsü. Iba kaket ya Assam Criminal Investigation Department (CID) ajanga renem aser Assam sorkari adoktsür.

Senden nung Bureau of Police Research and Development (BPR&D) Director General Rajeev Kumar Sharma-i özüng tasen asem indang temetettsütem lemsatep.

Naga nung alidak ajaklen NSF Martyrs' trophy bener senzütsü Lanurtemi longjemer linür; linük ka ama liyonga onür

Kohima, March 16, 2025

(TYO): NSF Martyrs' Memorial Trophy 2025 küm 25 buba asayamung nung Rs 15 lakh senpet agütsütsü osang metetdaksüogo.

Taküm September 13 nungi October 18 tashi "Goal for Peace" omen nung ajemdaker iba asayamung amungtsü.

Iba osang ya NSF Martyrs' Memorial Trophy 2025 steering committee (SC) ketdangsürtemi osangbener den jembidang ashi.

Deobar nikongdang Hotel Japfü nung Chairman Medo Yhokha, Co-chairman Khrielievi Chüsi, Secretary Neizokhotuo Belho, member Kelhouneizo Yhome, Naga Students' Federation (NSF) Assistant General Secretary Kenilo Kent aser Angami Students' Union President Khriesamhalie David Mere nungeri osangbener den senden ka mena liasü.

September-October nung asayamung ya Indira Gandhi Stadium Kohima aser Chumoukedima Stadium nung asayatsü ta parnoki ashi.

"25 buba asayamung asoshi senpet Rs 15 lakh ajungketogo. Takok marok angur nem Rs 5 lakh, tanabuba jenjang angur nem Rs 3 lakh, semi-final nung tamakok angur telok shia nem Rs 1 lakh aser quarter-final nung tamakok angur telok shia nem Rs 80,000 agütsütsü" ta Yhokha-i ashi. Maneni, Best custodian, defender, top scorer, player of the tournament, best midfielder aser best rated team shia nem Rs 25,000 aser Under-18 players nungi most promising player nem Rs 30,000 senpettem agütsütsü ta pai ashi. Tesüiba nung champions aser runners-up telok ajaki taküm asayamung nung arua shilem agitsü mepishir ta taoba ASU aser NSF tir aser SC züngsem Yhome-ia ashi. Tekaratiba nung registration

anogo metetdaksütsü aser telok shia dang entry fee Rs 10,000 meshitsü aser taküm asayamung nung telok 60-70 shi kati shilem agitsü teimla lir ta paisa ashi. Asayamung ayongertem ASU aser NSF den külemi steering committee-i anogo 178 tashi tournament Trophy Tour senzütsü telemtetba agiogo. March 20 nungi tenzükter taküm September tom ka tashi Naga nung aliba tesem ajak-Arunachal Pradesh, Assam, Manipur, Nagaland aser Myanmar sema senzütsü.

Asür Kekuojalie Sachü aser asür Vikhozo Yhoshü na tepsetba anogo nung 39 buba Martyrs' Day amungtsü aser iba anogo nung asayamung indang trophy tasenba sayatsü.

NSF-i NSF Martyrs' Park nung anepdang 9:00 ako nungi martyrs' day programme agitsü.

Martyrs' memorial tournament shisateta tenzükba nungi tanü tashi iba asayamung ya lanurtemi saisapong ajanga temeten aser yimjung bushiba tamaitü ama lir, ta NSF AGS Kent-i ashi.

Iba asayamung ajanga NSF putiotsü nung mapang tamajungtiba ka ajuruba bilemtetdaksür. March 20, 1986 nü NSF lenisüba kübok kaketshir meyrjang aikati Nagaland ajungalen kilometer 5 nungi 20 tashi Disturbed Area Act atsülangba atema lungkak aita liasü ta pai ashi. Iba den külemi NSF-isa Nagaland nung IPS cadre benokba anema lungkak ait kechiyong iba ajanga non-locals anioktsü. Kaketshirtemi timi dang lungkak aيتدang Alichen nungi police-i kaketshirtem dak injang khaloktsü aser idangji Kohima nung asür Kekuojalie aser Kigwema nung asür Vikhozo na khaset.

Tenati taküm bendanga agütsüba ya tanü tashi lanuputu asoshi temeten bushiba aser yimjung atema noktakba tamaitü ama züngshir.

Kaketshirtem, lanurtem aser temeimertemi March 20 nü NSF sentong nung adentsü pelashishia jaoker ta AGS Kent-isa metetdaksü.

"Iba lendong nung asürtem ya Angami nung asüba agi 1980s tatemlen ka tashi Angami nung atema dang ayongzükba asaya saka 1992 nungi asayanür ajak asayatsü lapokja liasü" ta SC co-chairman aser KMC Deputy Chairperson, Chüsi-i ashi.

NSF Martyrs' Memorial Trophy 2025 25 buba asayamung nung ASU aser NSF nati kasa shilem agitsü aser Naga nung ajak longjema lir ta osang sangoktsütsü ta paisa ashi.

Osangbenertemi iba asayamung nung government sponsorship indang asüngdangdang "tayongertemi asayamung shia lapokdang aser tembangdang tongti nisungtem jaoker aser parnoki mulungsoa tenla agütsür saka iba ya government sponsor mesüra state senpong nungi agiteta yarir ta züngshitsü makok" ta Chüsi-i langzü.

"Taküm asayamung ya khenyongi balaka asütsü aser football asayaba dak alia committee-i kaketshir teloktem den külemi Naga loktiliba nung shilem balala tsüngda tangatetba tajung nung olemtep alitsü meranger, kechiyong asenok tsüngda tongtepratep anünga lir aser tanü Naga nung balala loksa oa lir" ta SC chairman Yhokha-isa metetdaksü.

"Lennir taintemi pei ajangzüktsü aser telesa adoktsü tangatetba nung asen loktiliba ojang dang lemsadakjang. Onoki iba agi laktetogo. Lanuputui külemi linür aser linük ka ama külemi liyonga onür. Anungji onoki iba inyakyim anendaktsünür aser asenok azükarutsüsa lenisüba tajung aginür" ta Yhokha-isa tayongzükba ka agütsü.

Assam aser Nagaland chief minister na ajuruteper



Guwahati, March 16, 2025

(Agencies): Northeast state ajak nungi chief minister temi Deobarnü Union Home Minister Amit Shah den senden mamandang Assam aser Nagaland nungi CM tem ajuruteper onük kar lemsatepogo. "Chief Minister Himanta Biswa-

i Nagaland Chief Minister Neiphiu Rio den tanep Hotel Radisson Blu, Guwahati nung ajuruteperogo" ta Assam Chief Minister's Office (CMO)-i metetdaksü.

Tenati Assam, Nagaland aser Northeastern region ajunga dak sendakba onüktem lemsatep, ta parnoki ashi.

Minister Kruse-i tanü tendak tayongzükba balala tebilemtsü lemsatep



Dimapur, Metsüremi/March 16 (TYO): Minister, Women Resource Development and Horticulture, Salhoutuonuo Kruse-i kanga kera melenshia aoba lima nung mapa manguba tebilemtsü, libajen raksaba, kanga kera tejakleni aoba lima nung sobaliba wazüka ayuba nung timtem ajuruba densema tayongzükba balala aser tebilemtsü lemsatepa liasü.

"Transforming Challenges into Opportunities" omen nung ajemdaker Tsiepama village, Chümoukedima nung Chakhroma Students' Union pur 40th General Conference tenzükba sentong nung jembidang, item tayongzükba koktettsü asoshi kija shiasatsü, skills aser tasü ita nokdakba nüngdaker, ta Kruse-i ashi.

Akhi otsüla-oboula nunger mapang nungi tatishitsü bener arua jembidang, timtem liaka parnoki par ayak wazüka ayu aser lokti telungjem nung tashi ita yanger, ta Kruse-i ashi.

Temelenshi arutsü asoshi tashi tulutiba hadirji shisaliok ya lir, anungji degree kisüing nung merangloki shisatsü, practical

skills aser classroom alema oa angazüksü tangatetba alitsü nüngdaker, ta lai kaketshirtem dang ashi.

Melenshia aoba lima den lirumedema aotsü asoshi technology tasentem bushiteta aotsü tongtipang lir, ta lai ashi.

Kruse-i kaketshirtem dang sorkar mapa, entrepreneurship, agriculture, horticulture aser tourism nung maongka bushitsü ayongzük aser pei poksünga alitsü aser rongsenketzüng nung tashi angutsü lenmangji itemji dang lir ta ashi.

Nagaland ali temu agi sünga lir aser tongtipang tesem nung lir, anungji aluyimba aser horticulture asoshi tapet aser state ya India indang "Kiwi State" akumtsüa anameta nung lir, ta Minister Kruse-i ashi.

Kruse-i kaketshirtem dang meranga azüngtsü aser pei nükjilding atongtsü asoshi bendanga agütsür inyaksü ajungshia liasü.

Lai takok angutsü asoshi Tsüngrem tsübotsü, ochishia alitsü aser saksalema alitsü ayongzükba liasü.

Laisa CSU tenzüker nem

tenünsang agütsü aser parnok ajanga Chakhroma aser Angami nunger aser Naga nunger atema shisaliok aser terenlok maparen nung shilem tajung agiba tenüng sanga liasü.

Sentong metenzük dang lai mung dang indang nüngshilong ka yimtsüing süngkum nung sayatsü.

Iba sentong nung CSU tir Kezhawelie Richa-i tir o jembidang kaketshirtem dang Tenyidie oshi angazüka jembitsü aser competitive exam atema meranga azüngtsü aser entrepreneurship nung temulung agütsü ayongzükba liasü.

Organising Committee convenor Visako Rino menden sür sentong ya Pastor, Christian Revival Church Tsiepama, Seyiezhale Khro-i sarasadema tenzük aser Tsiepama Students' Union (TSU) tir Rokosielie Geisuo-i pela agizükba o jembia liasü.

Iba sülen Angami Students' Union vice president Thejalkhoukho Thomas Khawakhrie ajanga salem o jembi aser Kekhriesino Keyho-i temeja ken ka tena liasü.

Assam Rifles-i National Vaccination Day amung

Dimapur, Metsüremi/March 16 (TYO): Nüburtem anema lidaktsütsü asoshi maneni meranga inyakba nung shilem ka ama Assam Rifles temi Kiphire district kübok Akhegwo yimtsüing nung National Vaccination Day indang awareness sentong ka ayongzükba liasü.

Tashidak balala nungi jenbua alitsü aser tarutsü nung nüburtem anema lidaktsütsü asoshi

immunization ajanga tongtipang shilem agiba yimdaklir nem angatdaktsütsü nükjilding nem iba sentong ya ayongzük.

Sentong nung medical expert temi shisa lemsatepa jembidang mapang shidak nung nisung ajak vaccine agitsü tongtipang, ta ashi.

Sensaksemba mapang yimdaklir temi shilem tajung agia immunization ajanga tajangzük

anguba indang angazükba liasü.

Kasa mapang Assam Rifles temi yimdaklir nem mozü tabu balala lema agütsü. Iba mapa ajanga Assam Rifles-i nüburtem asoshi bendanga agütsüba tali jangjar aser tarutsü nunga healthcare dak sendakba nung awareness agüja lenmang balala nung yariteptsü temulungtetba nung lir, ta sangdong ka ajanga ashi.



St. John School Changtongya nung shisalen teyuba sentong ka nung shisalen teyurtem den tesayurtem aser tanurtem noksa nung angur. Iba sentong nung shisalen sayurtemji Conservator of Forest & Field Director, Intangki National Park, Wb.T.Aochuba IFS, School Education department nung Joint Director & DEO Peren Wb.Limadangit Jamir. Executive Engineer, Mechanical Wb.Alemtoshi Imsong aser SDO, PWD Wb.Imtisunep Jamir nungertem liasü. Iba sentong nung kaketshirtemi shisalen sayurtem den parnok taküm nung tejangraba tongteta züngtettsü asoshi kaketshisatsü bushibaren nung temetetnüba aser tebilembatem asüingdanga lemsatepba mapang agia liasü. (CTN. March 15,2025.)

Ramen tendanga osang agütsütsü ayongzüker

Kohima, Metsüremi/March 16 (TYO): National Vector Borne Disease Control Programme (NVBDCP), Department of Health & Family Welfare, Government of Nagaland ajanga private aser public healthcare providers ajunga dang temang metar ajunga dak ramen tendangtsü ayongzüker.

Asen linük nung ramen samatsüba jenjang ka nung lir asünung ramen agi shiranger ajak putettsü tongtipang lir ta ashi.

Nüburtem anema lidaktsütsü mechi aser kera puteta tim yimya nung anepalutsü aser ramen tebilemtsü ajemdaktsütsü nükjilding nung Government of Nagaland-i Epidemic Diseases Act, 1897 indang Section 2 kübok tashi agüja aliba amshia healthcare providers, NGOs, Civil Society Partners aser dang stakeholders ajungai ramen cases ajak tim ketdangsür nemo sang agütsütsü metetdaktsür, ta Dr.E Motsuthung Patton, Principal Director, Department of Health & Family Welfare ajanga sangdong nung ashi.

Malaria indang positive case osang tejangja ya tekeratiba nung Chief Medical Officer, District Vector Borne Disease (VBD) Officer, mesüra State Programme Officer nem metetdaktsütsü, aser ibaji ajanga epidemiological assessment aser nüngdakba mera agitettsü.

Ramen tashidak menatepba mapang iba tashidak mapang

shia poktet dak aser tashidak poktetba tesemi tawa-tanü aor temang metara tendangtsüla, ta ashi.

Ramen agi shiranger temang metatsü, ajungbena süksena aser temang tsüka aittsü, tekolak angotsü, temang nguyangushitsü, mangmangtsü, saksütsü aser tepang agi rasaa meshiteti temang metatsü.

Microscopy of blood for malarial parasite, Antigen-based bi-valent Rapid Diagnostic Kit (RDT) aser/mesüra Molecular diagnostic test ajanga ramen tashidak aliba jangjatettsü.

Anungji sorkari ketdangsüba clinical establishments, private mesüra NGO sectors, aser Clinical Establishment (Registration & Regulation) Act, 2010 kübok register süa aliba practitioners tem densema healthcare providers asoshi iba sangdong ya agütsü.

Government health institutions nung doctor tem aser registered private medical practitioners temi ramen putetra tekeratiba nung District Health Authority nem osang agütsütsüla.

Epidemic Diseases Act, 1897 (Act No. 3 of 1897) kübok item ozüing kübok manidaker tem Indian Penal Code (45 of 1860) indang Section 188 kübok merenshitsü.

Anungji healthcare providers, lokti tentet balala aser kija shiai yaritepa ramen samatsüba maparen nung shilem agitsü aser nübur kumzükba ayutsü NVBDCP ajanga ayongzüker, ta sangdong ajangasa ashi.

NSBSG pur Scout Masters aser Guide Captains training agi

Dimapur, Metsüremi/March 16 (TYO): Nagaland State Bharat Scouts and Guides (NSBSG) ajanga Scout Masters aser Guide Captains (1st phase for 2025) atema Basic Course training ka NSBSG State Headquarters Bayavü Hill, Kohima nung March 7-13, 2025 anogotem agüja liasü.

Iba Basic Course training nung Chümoukedima, Dimapur, Kohima, Meluri, Noklak, Shamator, Wokha aser Zunheboto district tem nungi tesayur timba sür nisung 33 dena liasü.

Iba Course nungya Fundamentals of the Bharat Scouts and Guides, Scouting/ Guiding ji kechi, History and Origin of Scouting, Scout/Guide Salute, Sign, Motto, Scout/Guide Promise and the Scout/Guide Law, Leadership Skills, Knottings, First-Aid, Compass, Drills, Ceremonies balala, Campfire, How to open and run a Scout Troop and a Guide Company, Estimation, Woodcraft Signs, Hiking, Cooking without Utensils (Backwoodsman cooking) amala theory aser practical session tem agüja liasü.

Basic Course ya R. Albert Solo, LT (S) - State Training Commissioner (Scouts) aser Kiyakhrienuo Solo ALT (G) -

State Training Commissioner (Guides) na lenisüba kübok State Training Team ajanga agütsü.

March 12, 2025 nikong dang Grand Campfire ayongzük, aser yangji Founder, Naga Mothers Association aser Padmashree 2024 sempet angur Sano Vamuzo ya Grand Campfire Chief liasü, shiba NSBSG indang Vice President lir.

Lai iba training nung shilem agirtem den tayongzükba o jembia lanur asoshi temeim sayua pei poktetdak aser ayak metettsü, anogoshi Tsüngrem bilemtettsü, anogoshi mapa tajung inyaksü aser lanurtem sayubentsüa lenmang tajung sayutsü ayongzükba liasü.

Basic Course (1st phase 2025) ya March 13, 2025 nü tembang, kong State Commissioner (Guides), Nino Iralu-i o tatsüka jembia nisan atsüzüka aser National Anthem tena Course tembanga liasü.

Kohima, Meluri aser Wokha district tem nung DEOs aser Sr. SDEOs temi iba Course atema tetemsü tesayur tem yokba atema pelar, ta NSBSG sangdong ka ajanga ashi.

Ano NSBSG züngsemtem atema 1st State Level Adventure Programme ya March 27-31, 2025 anogotem agitsü lir.

Bhagwant Mann-i Chief Minister menden metoktsütsü: Kejriwal



Punjab nung AAP sorkar kum asem abensaba nungtem nung March 16, 2025 nü AAP tongti lenir, Arvind Kejriwal-i Amritsar nung Golden Temple semdangba mapang tangokba noksa nung angur. Kasa noksa nung Punjab Chief Minister Bhagwant Mann-a angur.

New Delhi, March 16 (Agencies): Amongnü Aam Aadmi Party (AAP) tongti lenir, Arvind Kejriwal-i, Punjab Chief Minister Bhagwant Mann memelentsü; Mann-i kümsük (term) abensaa CM inyakba dang masü saka ano maneni kümsük ka inyaktsü, ta metetdaksü.

Tawa Kejriwal-i anogo 10 nü 'Vipassana meditation session' tembanga liasü aser Punjab nung AAP sorkar kum asem abensaba nungtem nung Amongnü pai Amritsar nung aliba Golden Temple semdang. Kejriwal den Mann aser AAP lenirtem densema liasü.

Osangbenertem den jembidang Kejriwal-i, tang

Punjab nung tebilemtsü onük tulutiba anaji temesepba mozü aser ochimashi lir, ta ashi.

Paisa, "Temesepba mozü aser ochimashi anema raratsü atema Punjab nung nisung crore asem longjemogo. Iba tongbang ya ochi atema lir," ta ashi.

Opposition-i Mann Chief Minister menden nungi anendaksütsü akok, ta jembiba dak sendakba nung Kejriwal-i, "Mann-i kum pongu abensaa inyaktsü, anungji nenok shisa tebulu. Pai taruba kümsük-a abensaa inyaktsü," ta ashi.

Tawa Congress party lenir Partap Singh Bajwa-i, AAP MLA 32-i pa den tongtepratepdar, Mann-ia BJP

den tongtepratepdar aser kobi melii Kejriwal-i Mann CM menden nungi agientsü akok, ta jembia liasü.

Punjab nung AAP sorkar kum asem abensaba anogo nung Mann-i X ajanga, "Punjab nung lanurtem nem sorkar mapa 52,000 agütsüogo," ta metetdaksü.

Paisa, "Tesüiba kum asem tsüngda onoki inyakba mapatemji tesüiba kum 70 nunga meinyakteti liasü," ta metetdaksü.

AAP-i state nung temesepba mozü anema tesashiba raratsü anungji Punjab atema AAP mangdang ataloktsü asoshi nüburtem nem yaritepdaksüner, ta ashi.

Tanü Ato kilonser Modi-i Raisina Dialogue tenzüksütsü

New Delhi, Metsüremi/ March 16 (Agencies): Hombarnü New Delhi nung Ato kilonser Narendra Modi-i anogo asemnü Raisina Dialogue tenzüksütsü aser iba sentong nung linük 125 nungi tejaokertem aika adentsü, ta ketdangsertemi metetdaksü.

10buba Raisina Dialogue nung New Zealand Ato kilonser Christopher Luxon, US Director of National Intelligence Tulsi Gabbard aser Ukraine Foreign Minister Andrii Sybiha nunger densema lenirtem aika adentsü.

Tang mezüng Taiwan nungia lenir ka iba sentong nung adentsü, aser ibaji ajanga tesüiba kum ishika tsüngda Taiwan aser India na tsüngda amalitep tsütsü tesendaktep

tajungba akümba kuli sayur.

Raisina Dialogue ya think-tank Observer Research Foundation (ORF) aser Ministry of External Affairs (MEA) nati senteper ayongzüker.

Iba sentong nung linük 125 nungi minister tem, Tirtem, sepai commanders, industry aser technology nung lenirtem, shisashirtem, osangbenertem aser think tanks balala nungi mongintem aika adentsü, ta Amongnü MEA-i metetdaksü.

Iba sentong nungsa linük 20 nungi foreign minister tem adentsü. Ukraine foreign minister katia India semdangtetba ya US-i Ukraine aser Russia na tsüngda rara khenpiga anentsü atema meranga inyakba ajanga lir.

Hombarnü iba sentong tetenzük nung New Zealand Ato kilonser Luxon-i okila jembitsü.

Iba sentong nung Slovenia, Luxembourg, Liechtenstein, Latvia, Moldova, Georgia, Sweden, Slovak Republic, Bhutan, Maldives, Norway, Thailand, Antigua & Barbuda, Peru, Ghana, Hungary aser Mauritius nungi foreign minister tem adentsü.

Cuba Deputy Ato kilonser Martinez Diaz aser Philippines Foreign Secretary Enrique A Manalo nata iba sentong nung adentsü.

Taküm iba sentong omenji "Kalachakra - People, Peace and Planet" lir. Anogo asemnü sentong nung lenirtemi omen trok nung ajemdaker o lemteptsü.

Taila passport aser visa amshir tem kum tenet jail nung puoktsü

New Delhi, March 16 (Agencies): Tang Parliament nung benoka aliba Immigration and Foreigners Bill, 2025 agizüka ozüng kümra iba ozüng kübok India-i arutsü, alitsü mesüra toktsür aotsü atema taila passport mesüra visa amshirtem kum tenet tashi jail nung puoktsü akok aser senchi lakh 10 tashi achitsü.

Iba Bill ya March 11 nü Lok Sabha nung benoka liasü.

Union home ministry-i renemba bill kübok hotels, universities, hospitals aser tanga rejutemi bendangertem mapang tali monglokba osang ketdangsertem nem metetdaksütsü.

India-i aruba tayimtsütem aser rongtemia jelia ketdangsertem nem passenger tem osang tejangja metetdaksütsü.

Iba ozüng kübok ainlen senzütsü atema taila documents amshirtem kum ana tepuokdak ayutsü mesüra kum tenet tashi ayutsü akok, iba denji külemi senchi sen lakh 1 nungi lakh 10 tashi achitsü akok.

Bendangertem shirnoki travel documents tejangja makai India-i arudir parnok kum 5 tashi tepuokdak ayutsü akok aser senchi lakh 5 tashi achitsü.

Immigration and Foreigners Bill, 2025 ya agizükra iba bill ajanga tang aliba ozüng pezü-Immigration (Carriers' Liability) Act, 2000 den linük nüchiso mangudang aliba ozüng asem- Passport (Entry into India) Act, 1920, Registration of Foreigners Act, 1939 aser Foreigners Act, 1936

melentsü.

Parliament nung iba Bill benokdang Minister of state (MoS) home affairs, Nityanand Rai-i, "Onoki iba ozüng ya India-i bendanger kar aruba nokdangtsü atema benoker masü. India-i nisung teimba arutsü melunga lir, ajisüaka ibaji immigration ozüng kübok asütsüla. Linük security atema iba ozüng nung aliba telatetbatemji tongtibang," ta metetdaksü.

"Rongsenkettzüng tsütsü India indar, anungji bendanger raliwalirtem aika arudaksütsü atema sorkari facilities agütsütsü. Ajisüaka linük security atema inyaktsüji sorkar atema tongtibang teinyaktsü mapa lir," ta paisa metetdaksü.

Ketdangser kati, "Iba Bill ajanga bendangertem ozüng alema India-i aruba tebilemtsü bentettsü aser bendangertem mapang tali India nung monglokba putettsü," ta ashi.

Student visa, medical, research, employment, missionary mesüra project visas nung anogo 180 tashi amongtsüpurtemi India tonga aruba sülen anogo 14 tsüngda Foreigners Regional Registration Office (FRRO) mesüra Foreigners Registration Office (FRO) nung register asütsüla, ajisüaka Pakistan nungertemibo India tonga aruba sülen ghonda 24 tsüngda register asütsüla.

Home Ministry data ajanga ashiba agi, 2023 kum April 1 nungi 2024 kum March 31 anogo tashi nung bendanger lakh 98-i India semdangogo.

Helmet masemba atema Bihar nung MLA ka dang senchi achi



New Delhi/Patna, March 16 (Agencies): Bihar yimtiba, Patna nung Holi benjung amongba anogo nung RJD MLA, Tej Pratap Yadav-i helmet (merang-korang) mesemi scooter aniba atema pa dang senchi 4,000 achi.

Yadav ya Rashtriya Janata Dal (RJD) nungi MLA lir aser taoba mapang Bihar health minister inyaka liasü. Patna nung Bihar Chief Minister, Nitish Kumar'er ki anasa helmet mesemi scooter aniba atema traffic police-i pa dang senchi achi.

Iba dak alia pa ket nung

scooter indang insurance aser pollution certificate-a maliasü.

Osangbener den jembidang traffic police SHO, Brajesh Kumar Chauhan-i, senchi ajak senteper pa dang sen 4,000 achi, ta metetdaksü.

Chauhan-i, "Nisung ka scooter nung helmet mesemi scooter aniba video ka social media nung kanga prokshia liasü. Iba sülen maitsü jangjar pa dang senchi achi. Insurance aser pollution certificate-a expire sür liasü. Senchi ajak senteper 4000 achi," ta metetdaksü.



March 16, 2025 nü Telangana kübok Nagarkurnool nung Srisaillam Left Bank Canal (SLBC) project tunnel chirepba ajanga anenbanga alirtem küzmüksü atema tunnel telungi aitsü lia tangokba noksa nung angur.



TIR YIMYIM YIMOBILEM (EDITORIAL)

DIMAPUR MONDAY, MARCH (METSÜREMI) 17, 2025

Asenok Doctor agi anüngtsüsa na ?

Nagaland nung Aotsür Aortemji Tsüngrem osang tajung abener, temeim mapa inyaker, taneptsür aser ochi lenmang sayurtem lir ta tangari ashitsüsa asenok lia aru aser maneni alitsüla. Tsüngkusü, mangkotep sü, angtonng sü masü saka item mapa tajungtemji asenok Aotsür Aor ayak asütsü tim. Ajisüaka, alemli Nagaland state-a mangudang tangari asenok meima lapoka yutsüba mozü ki, Mokokchung District Hospital, koba dang tangbo Imkongliba Memorial District Hospital ta ajar, iba mozü ki dena anepalu mesütettsüsa alibaji Kohima nung alir kisüng dang atongtsüla masü, saka aji asenok Aor agi maor kuma aliba ajanga tangari mezüngmeshiba mapa ka asütsü. Aji oda, tanela nung süli mesüra shi temang nung süli taneptsü asoshi nüngdakji Kohima nungi masü Mokokchung nungiang Kohimai yoktsüsa asenok alitsüba ser nung, asenok meyong shilem dena Kohima nungi meyoktsüsa asenok aliba yagi asenok tejakleni aoba kin masü kumogo ta sayur. Alemli kaketshisatsüa Mokokchung aser Impur nungi dang Naga nung er ajak asoshi angü. Item tesemtem nungi tashitemetet angazüka bener aoer tangar kintembo item tashitemetetji pei kin aser nübortem asoshi temoatsü senmang kuma tanü tashi amshidagi saka asenok lima nung item tashitemetet aser taneptsü angudak tzübotem ajak kongadokogo. Akhi memesük, joko asenok rongnung pei lima aser pei nübortem meimba shisatsü mali, pei pei ajung aser pei pei akatsü asoshi dang bilema inyakba agi, asenok telongjem mali kümer tangar nem asenok kija kija jaoka mesüshidaktsür. Atangji, asenbo taneptsü bushia Delhi Mumbai tashia aotsü aser asen tanurtema kaketshisatsü bushii kasa yimti tajungtem jagi yoktettsü, ajisüaka asen yimer, asen kinunger aser asen nübortembo asen ama masü, parnok aika pei among adena NST bus nunga moutettsüba purtem lir. Item asoshiji Mokokchung mozü kidang taneptsü angutsüsa asenoki anepalu mesütettsütetra asenoka yimten yimsüsür akümba tetezüji kechi asütsü ? Aji oda, asen lima nung asen tsürabur aser adianutem taneptsü mengutettsüsa government mozü ki tajung ka meyutsütetra, asenoka government nung tulur akümba tetezüji kechi asütsü ? Kasaji asen lima nung asen nübortem mozü kidang teyari mengutetba agi süadokra, asenoka medical doctor akümtsüsa azüngba tajangzük kechi asütsü ? Kechiba Mokokchung District Hospital dang Imkongliba Memorial ta enoksema ajar ? Aji tenüng atema dangbo masü ? Asenok tanü jenjang tajung nung alirtem aika masodang aser asen tsüraburtem timtem touthi tulu nung aliba mapang, Nagaland state bener aruba mechi kaseta endokba lenir tenüng narokümji ibai lir. Dr.Imkonglibaji tanü asen asübo 'ni anir timtem lendong ajak tizükteta state mesemtetba lima nung ni chief minister asütsü,' ta tiaksanga alitsüba, pabo asenok asoshi state mesemteta yutsür anosa mozü kidang shiranger yaritsü aoba mapang pa taküm atemtsüsa atalokba otsüji Mokokchung mozü ki ya lir. Aji oda, asenokbo tenüng jatsüba tatem ser pei pei senshi senshir pei pei agitsü inyaka Kohima aser Dimapur nung mokteptsü asü, mesüra asena asen tsüraburtemi mesemtetba lima mamadoki parnok tenüng nung ano khen sentsüwangshia shia arudaktsütsü (?) ta bilemtsüba asenok Aor yimsüsürtemi anir Aor zü agi sosemba tetsür aser tebur ajak khuret aser shilem asütsüla. Aji oda, Mokokchung nung akhi temoatsütem mamongtsüsa, ashiko, telidakertem daka tokolok tila, shisa agi matong, arok ajungtsü mebilem pei asoshi dang bilemba shisatsü alitsüa akok. Aji oda, Mokokchung nung dang masü Kohima aser Dimapur nunga aseno dak tashimait ka tangaria sempatsüsa alibaji, kar dak alaka, asenok aika ali nung kanga morumoruba kin aser nisung kumogo. Iba jagi yimti nung kongsa gari lenmang temesü lir, aji Aor kima asütsü ! Koba kilemsa pei kidanger arr atena oa yanglua lir, ajia Aor ki asütsü ! Iba ama shisatsü mesadem tokolok tila jagi asenok dangi arutsü aliba temoatsü aser teyaritem ajak nokdangadoker. Item shisatsü aser tangatetba tilaji kodang asenoki endokdir, idangjiang asenokji shitakba yimsüsür aser tulur kumadoktsü aser asen lima nung terenlok mapa tulu sademsadema inyaktettsü. Aji oda, tang ya Mokokchung District Hospital nung Doctor aser tashidak tendangba oset aser inyakerkem agi anüngdang masü, yabo asenoki asenoksasa Aor memesük akümba agi ataloker.

OLEMSABANG

To,

Aor Baptist/Christian Tamanger Ajak Dangi

Sub:- NAGALAND KHRISTA ASOSHI (NAGALAND FOR CHRIST) YIMYIM OSANG AGÜTSÜTSÜ ABAM-I TENYABA ANGAA ASEN TSÜRAPORTEM NAGA KIN PALALA DANGI AORTEM ASEN AOR TSÜRAPOR TENÜNGTEM AKINÜA MESHER. PARNOKJI 1959 KÜM ALU NUNG METSE YOKBA MAPANG ACÜTSÜ.

Adianutem,

Tamasa Yisu Khrista shibai asen Aor palaka mejetta meimer Pa tenüng nung ni aser ozü kibongi temeim Salem abenner.

Covid-19 wara tako teyalong nung ni Nagaland For Christ ta Naga nungertemi ayimoktsübayong Tsüngrem-i asenok dang dali aochir ta Tir yimyim aser Ao Milen anaprong nung adoktsür züngdaktsüdang asen Ao Senden Literature Board Chairman mulongjang nung kanga kongshia azüng, aser pai kü dangi mobile ajanga jemipia nai iba Article ya

kaküt kümma züluang aser asen ASLB-i Aor lanur ajak nem School (Ruju) nung züngdaktsüdi ta mepishi, ni künbo mah ta langzü aser ni kaküt records nü nem agütsüdi naiang züluang ta jempi saka pai ano naisa zulu tsüla ta-kang langzü, kechiyong ni kü teperem tongtoret nung timtem alibayong küm aeka süidaktsü saka Tsüngrem taochi agi tangbo ni tajungba kumdake,

Tsüngrem tenüng asanger.

Tatalokbaji ya;- 1958 küm Ao-CE Convention Changtongya yimtiba nung alidang tongtibang telemtetbaji NAGA NUNGER-JI Khrista ASOSHI aser iba oulaji Naga kin ajak dangi sangdongtsü parnoki tasüit-itta lemtet. Iba wadangji imyaktsü ABAM ajanga asen tsürapar tajung aeka Naga kin ajak dangi tsüngdong aotsü nungloktsü, saka shirnoksa shim aser shir

kin-i aotsü shim-ar record-ji mengutetter, anungji jogo parnok chirnur aser semchir karidanga metetta lira bushiteppa jangjateptsü ni nenok nem khuret nungloktsür aser Ita ka tsüngda nung kü küt tongdaktsüner.

IBA FORMAT NUNG AGÜJA ALIBA AMA INYAKDAKTSÜNER.

Sl.No	Taor tenüngtem	Ita/Anügo	Koba kin-i ao	Kuli karh lira
1.	Leader			
2.	Member			

Ni tongmelang agi sayur tangashe ano talila lira inoksemmang meyimlaeka yaküm 28-08-2024 anügo " FASTING Is It Relevant Today? kaküt tela ka Tsüngrem tenzükker Mongin okula Rev. Dr. T Alemmeren-i kibong toktsür Naga kin palala dangi anügo Lirrü Yisu osangtajung shia jajaba aser item anügotem nungji pai anir telok ka Nagaland For Christ osang sangoktsütsü parnok telokji Kohima District-i yokbaji parnok May 7-17-1959 (Anügo terka) akia jajaba lir. Parnoki anügo ka nung Arogo ana asem semma jajaba angutsü okula den aortemji metetsü ni taküm 12-02-2025 nü par ki bushia Dimapur-i ao aser ajuru, ni pa aser kinungtsü ajurui aobaji kü dang nungibo tena pelaba tuluba liasü, tenaden temoatsü jendi ngua sensaksem. Par putu Tsüngrem tenzükkertemji machemachem den timtem tulu aremma Tsüngrem tenzüksangji tang arshi küm 94 (Ninety Four) lir, jogo shesatsü tukulok tashemaityong par telokpur shinga pai mepilemtetter ta langzü. Anungji asen tsürapor den Kohima District-I aortum karidanga metetta lira kanga pelatsü.

Kü küt nung Zunheboto District-leni aortembo parnok tenüng aser yimtem kü küt nung record tejangja lir.

Parnokji :

Mangmetong Arogo nungi - 3

Longsa Arogo nungi - 2

Aliba Arogo nungi - 1

Ungma Arogo nungi - 2

Total 8

Parnok Zunheboto District leni aortemjibo yimtsüng 20 (Medsüshi) semma jajaba sülen Indian Army-i por rishikangshibaji kangasa tako ajuruba anügo aeka timtemsetta anir senzüba asenoki kaküt adokdang metetjemtsü.

Asenok Naga nungeri tebang agi Nagaland For Christ tadang jemipir-ashe Zunheboto lemni aortemjibo Aor parnok 8 (Ti) den sumi (Moyaleni)-a par asem (3) tena liasü. Yihuda nungeri Yisu rishikangshiba mesükka Indian Army-i Moyaleni aortemdak kangshimesu. Iba tatalokba lanurtemi Drama Act cür Indian Army dang sayunütsüka lir, Nagaland For Christ ta osang sangoktsür rongnung Moyaleni aortem ajuruba rishikangshi jagi Naga nunger ajak alangzük ta ashitsüsa takoji shishia atalokka lir kakütji obala nunger dak atalokka jagi retretta aser tezüngnüsüka acütsü. Iba kaküt ya adokerbo thangar Naga kin-ia par oushi nung meyipzüktsü yongya atadarh. Iba kaküt yabo Aor atema dang macü Naga kin ajak asoshi semmang kaküt rongnung tongtipangtiba acütsü, kü jak mereprangi Yisu jak rapranga nenok ajaki yaridaktsünür aser sarasademjangma. Amen

Tongteprateptsü atema kü indang

Mobile No. 1. +91-9402867797 Whatsapp

2. +91-7085513927 Call

Nenok den Khrista

Züh nung Sosemba.

Sd/-

K.Lima Longkümer (Ungma)

Camp: Chümoukedima Town

Nagaland.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

West Virginia University nung kaketshir 1000-i Khrista agizük



March 11, 2025 aonung Morgantown nung West Virginia University campus nung UniteUS sentong agidang tangokba noksa nung angur.

March 16, 2025: Tang US tesem balala nung universities/ college campus tem nung UniteUS sentong ayongzüka agia arudar; Mongolbar (March 11) aonunga West Virginia University nung kaketshir 5,000 dak tali iba sentong nung aden aser kaketshir 1,000 dak temai Yisu Khrista nem taküm bendanga agütsü.

UniteUS sentongtem nung kaketshir aikati Khrista agizüka baptir aser tang tesüsa Morgantown nung aliba West Virginia University campus nunga kaketshir aikati Khrista agizükogo.

Osangbener den jembidang UniteUS tenzükla, Tonya Prewett-i, "Taonung Tsüngremi WVU Coliseum nung mapa tulu inyakba atema pelar. Campus balala semdangtsü

jelia onoki Tsüngrem dang teyari meshia sarasademer. Taonunga Morgantown nung kaketshir 5000 dak temai Tsüngrem bushia aru," ta metetdaksü.

Laisa, "Kaketshir 1000 dak tali kümüzükogo, talenba salaogo aser sabangleni ao. Iba ya alimai agütsüba dang nungi khenyongi balaka liasü," ta metetdaksü.

Prewett-i, "Taküm melenshidaksüba tekümtet. Taküm nung temelenshi adokdaksüba nüchiso. Taküm agütsüba tesendaktep. Yisui iba putu ajioker," ta metetdaksü.

WVU nung azünger Eliza Hocz-i, "Campus nung Tsüngremi atangji mapa inyakogo, kechiyong temelenshi ka atema kaketshirtem tzürar," ta ashi.

Prewett den Pastor Jonathan Pokluda aser IF:Gathering tentetla, Jennie Allen nunger leniba nung college campus balala nung UniteUS sentong agia arudar.

Taküm küm tetenzüklen University of Kentucky nung aliba Rupp Arena nung kaketshir 8,000 dak tali adenshia liasü, iba sülen Ohio State revival nung kaketshir 6,500 iba sentong nung aden aser kaketshir 2,000-i Khrista agizük.

Tang tashi nung college campus balala nung ayongzükbä UniteUS sentongtem nung kaketshir ajak senteper 100,000 dak tali denogo.

Taruba UniteUS outreach sentongji April 8 nü Southern Methodist University campus nung agitsü, ta sentong ayongertemi metetdaksü.

2030 küm tashi nungbo Khristan teimba aliba linükji China akümtsü

March 16, 2025: 2030 küm tashi nungbo alima nung Khristan nütsüng teimba aliba linükji China akümtsü, kechiyong communist sorkari yimsü balala nokdangyonga iba linük nung underground Arogo aika lir aser Khristan nütsüng kanga rendar, ta osang ka ajanga metetdaksü.

2030 küm tashi nungbo China nung Khristan nütsüngji US nung aliba Khristan nütsüng dang nungi teimba asütsü, ta mongintemi asadangteter.

Sociologists aser yimsü dak sendakba nung mongintemi research ka agiba ajanga China nung Khristan nütsüng kanga kera ainba asadangtetogo.

Tsüngrem dak mamangba Communist linük süaka Khristan nütsüng kanga kera arenba ya underground Arogotem ajanga lir.

Taküm nung tetezü bushia lanurtem aikati Khristan yimsü agizüker, aser aikati tamangba yimsü indang metetner, ta parnoki metetdaksü.

China nung communist sorkari yimsü dak sendakba organization kar nem dang temelaba agütsür, ajisüaka underground Arogotem ajanga Khristan nütsüng arener.

China nung yimsü dak sendakba nung mongin, Dr. Fenggang Yang-i, 2030 küm tashi nungbo China nung Khristan nütsüngji million 247 dak tali alitsü, ta metetdaksü.

2030 küm tashi nung China nung Khristan nütsüng million 247 shi akümtsü aser ibaji ajanga Khristan nütsüng aika aliba United States, Mexico aser Brazil linüktem ajangtettsü.

"Ibaji ajanga China ya alima nung Khristan nütsüng teimba aliba linük ka akümba dang

masü saka ibaji ajanga 'alima nung Khristan' teratet melenshitsü," ta Dr. Yang-i ashi.

China nung Khristan nütsüng kanga arenba ajanga loktiliba nung temelenshi adoktsü aser Khristan nütsüng teimba aliba tanga linüktem den tesendaktep tajungba akümtsü aser yimsü temeden nung temelenshi adoktsü, ta pai metetdaksü.

China nung sorkar ketdangsertemi register masüba Arogotem mita aoer aser lenirtem apur. Iba linük nung Khristantemi timtem balala ajangshiaka pei tamang jenjang manokshir.

Tang China nung nütsüng billion 1.4 shi lir aser Protestant Khristan million 58 shi lir.

2010 küm Yang-i, 2025 küm tashi nungbo China nung Khristan nütsüng million 160 akümtsü, ta metetdakja liasü.

ANOGO ABEN TSÜNGREM DEN

Temoatsütem - Khrista tekolak

"Saka temeim nung ochi jembia ajak nung Pa dak asenok aintsü, Paji tekolak, oda Khrista, aser Pa dak nungi temang... temangji peisasa temeim nung ina tain kümdaktsür" Efesa 4: 15.16.

Meimchir temang nung asameyang aser tebilemba ajak tekolak nungi agütsür. Kongshiba metetba , menemtetba, angashiba, menakdangba item ajak jagi temang junga aliba nung yarir. Parnoki kümdangdaktsür, aser ajung majung tendanger.

Khristaji Pa temang arogo nung tekolak lir. Tekolak ajanga temang anema alitsü ajak agütsür. Tekolaki meyarira, tenarongi temang nem osangtsüsang chiyungtsü agütsütsü makok. Tekolak medeni temang tenük telen kechai-a mapa kecha meinyaktet.

Temang nung tenüklen ajaki pei mapa shitak inyakba ajanga asenok temang indaktsür. Tepokboki temang shilem ajak nung mopung agütsür. Temulungjangi temang shilem ajak nem azü agütsür. Tezüi (nerves) tashi metetdaksür. Saka katia tekolak den mesendaktepi pei mapa inyaktsü makok.

Tsüngremi meimchir temang aser Khrista temang anapronglaji yanglu. Tenük telen shiai temang asoshi inyakba ama, tamanger shia Khrista temang arogo asoshi inyaktsüla aser alitsüla.

Syria nung tensa tamajungba akümba ajanga Khristantem tsübur

March 16, 2025: Syria nung akok," ta Hudson Institute nung küm aika civil war ajanga Center for Religious Freedom Khristan nütsüng kanga ajema Director, Nina Shea-i kümogo, aser tang Islamic metetdaksü.

Tamalen International telungpur Hay'at Tahrir al-Sham kübok Khristantem Christian Concern (ICC) Tir, tetsübu nung lir. Jeff King-ia, "Küm 2000

Tawa Islamic teloktemi jungnüa Khristantem tera nisung 1,300 dak tali tepsetogo yanga aliba linük nung aser parnok teimbaka nütsüng Khristantem atema tarutsü tia ajema aliba Shia Muslim mejangjai kümogo," ta nungertem lir. metetdaksüogoo.

Sorkar sepaitem aser Assad Latin Arogo nungi yimsüsüba mapang nung aliba Franciscan putir, Bahjat telungpurtem tsüngda raradang Karakach-i, "Kechi telemtetba aika tepsetogo. agitsüar Arogo dang nungibo

Anogo ana tejaklen Syrian nisungtemi temetetba. Aleppo Greek Orthodox Khristan, Adi yimti toktsür ajentsü mesüra Oweis-i, "Parnoki onok kibongtem melung. Nisung kar (Khristantem) ya atema kari telemtetba agitsütsü mamangertem ama züngshir," makok. Onok ama Tsüngrem ta metetdaksü. tenzüktsü bendanga

Paisa, Syria nung Khristantem-a 10 süogo, agütsürtemibo yimti ajisüaka tang tashi nungbo metoktsütsü aser tensa koba sorkar sepaitem aser ajangshidir repranga dang telungpurtemi Khristantemji alitsü," ta metetdaksü.

metetsümonga tepsetba masü al-Qaeda nungi jakzükbä südi ta bilemer, ta ashi. Hay'at Tahrir al-Sham telokibo

Ajisüaka Syria nunger Khristantem densema civilian Khristantem kanga ajak kümzüktsü, ta shisabuludar, ta paisa sangdongogo.

metetdaksü.

2011 küm Syria nung civil war tenzükbä sülen Aleppo

"Tang Syria nung tensa tamajungba akümba ajanga nung Khristan nütsüng aika Khristantem densema tanga ajema aküm, aser tangbo iba minorities- Alawites, Kurds yimti nung Khristan 30,000 shi aser Druz-ia timtem ajurutsüa dang anünga lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimym

Telemsa

(adj) balala akümba (division, parts)

* Naga nunger rongnung telemsa kanga adoka lir.

Telemta

(n) tenük telen agi tangar memenep (invalid, disabled)

* Nisung ka tenük mejungra telemta akümtsü.

OLONG PAITEP # 7093

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPLIN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7092 TELANGZÜBA**TIPLIN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER MA

Arishi küm 10 tain British nunger tanur kati minute ka nung "most decimal places of pi" shitetba atema Guinness World Record ka yangluogo. Bristol nung kaketshir Alberto Davila Aragon-i second 50 nung 280 digits of pi mokosto ser shiteta liasü.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

Youth Congress-i Reetam Singh apuba anema lungkak ait**Guwahati, March 16, 2025**

(Agencies): Guwahati nung Assam Congress spokesperson Reetam Singh apuba anema Lakhimpur District Youth Congress-i North Lakhimpur Police Station kima nung lungkak ait.

Reetam Singh-i Lakhimpur MLA Manab Deka aser par

kibong anema social media post ka züluba atema apu.

MLA Deka kinungsü iba atema North Lakhimpur Police Station nung FIR ka benoka liasü.

Iba ya BJP-i asaa tenük yoka mapa inyakba lir ta Congress party-i aitsür.

Tanü Singh police station-i

anir arudang Youth Congress züngsem noklang aika adenshir pa chioktsü takhangba agütsü aser sorkari yimtenren mapa atema ozüing amertem amshir ta tai tongloksü.

Singh ya Deobarnü North Lakhimpur nung judicial magistrate dangi anir ao.

Gauhati High Court nung PIL ka benokba atema pa dak tiyazü nung tai tongloksür ta Singh-i osangbener dang ashi.

Tetsür dak tashiyim agi shi nung medemba dak sendakba nung pai PIL benok aser iba nung anabo MLA Manab Deka den sendaktepa lir ta paisa ashi.

Lakhimpur District Congress Committee-ia Singh bail nung chioktsü atema map inyakdar. Pa atema okatsür Uttam Phukan-i Hombarnü bail petition ka benoktsü ta shiogo.

Yaoshang nung kar benjungteper; kar lungkak aiter; 1 asü**Imphal, March 16, 2025**

(Agencies): Manipur lendenlen tanü agi anogo asembuba Yaoshang benjung mungogo aser tensa mejungi liaka traffic control police dena ketdangsürtemi benjung tiptema amungsü atema mapa inyaker.

Yaoshang benjung nung tongtipang shilem kaji saisapongba lir aser nübortemi asaya balala ayongzüka asayar. Iba ajanga lanurtemi drugs aser yi nungi pilar mapa tajung inyakba nung shilem agidaktsür aser India nung Manipur dang sports powerhouse ta ajaba ajungketer.

Tanurtem aser lanurtemi Poon Pubi race (a race for women carrying an earthen pot

filled with water), Mukna (Manipuri wrestling), Chafuthugaibi (blindfolded hitting), aser Laphu Kabee (banana tree climbing) amala saisapongtem ajanga parnok sempettem sayuogo.

Maneni, parnokisa spoon races, tug of war, football matches, aser statue dances amala nung shilem agir.

Ano, Imphal East district nung Yaoshang benjung amungdang village volunteer ka apuba atema lungkak aita liasü.

Imphal East district kübok yimtsüng balala nungi tetsürtemi "Stop biased treatment among communities" aser "Rehabilitate the Indian originals to their original homes" yimym ayima lungkak ait.

Manipur police-i March 11, 2025 nü Laishram Romen (30) aputsü merangba anema All Andro Kendra Meira Paibis aser All Andro Kendra Clubs' Association ajanga lungkak aitba sentong ayongzüka agi.

Külen, Honibar aonung Maibam Lokpa Hillocks kübok Japanese Memorial Peace Park anasa Yaoshang benjung amungdang nisung ka lendong ka nung asü.

Yasüng 10:00 ako meta Naorem Birjit Singh (42) ta ser nisung ka pai aniba Honda Activa tsükokdang asü.

Manipur nung Yaoshang benjung ya March 14 nungi tenzük aser March 18 nü tembangtsü.

Amit Shah-i drug cartels ang taochi mesayutsü nenshir**Guwahati, March 16, 2025**

(Agencies): Imphal aser Guwahati zones nung Rs 88 crore alang methamphetamine tablets apuba sülen Union Home Minister Amit Shah-i drug cartels anema inyaksü osang metetaksüogo.

Iba dak sendakba nung international drug cartel

züngsem pezü pua lir.

"Drug cartels dang taochi mesayutsü. Modi'er sorkari drug-free Bharat ka akümtsü meranger aser Rs 88 crore jenjang methamphetamine tablets puogo. Imphal aser Guwahati zones nung international drug cartel

züngsem pezü puogo" ta

Amit Shah-i metetdaksü.

Narendra Modi'er sorkari drugs anema maneni inyaksü aser methamphetamine tablets aika apuba ya iba tenangzüka nung inyakba kuli lir ta paisa ashi.

Iba mapa tajung atema Narcotics Control Bureau nem tenüngsang tulu agütsür ta Shah-isa ashi.



Assam forest department-i Dibrugarh Airport nung ango tapu khenyongi balaka tejang 2,200 tashi puogo. Ketdangsürtemi IndiGo tayimtsü ajanga Delhi-i bener aotsü aliba ango apu aser parnoki ango ya Channa orientalis asütsü ta bilema bushisüngdang südar.

North Macedonia nightclub mi lendong nung nisung 51 asü



Skopje, Metsüremi/March 16 (Agencies): North Macedonia nung nightclub ka nung mi adokba sülen nisung 51 asü aser nisung 118 yirua liasü, ta ketdangsürtemi metetdaksü.

Mi ya linük yimtiba Skopje nungi anütoklen km 100 shi pilar aliba Kocani jila kübok Pulse club nung 02:30 (01:30 GMT) meta adoka liasü.

Iba club nung nüngtugu popular hip-hop duo DNK indang kentenba sentong ka nung nisung 1,500 shi dena aliba mapang mi adoka liasü. Video balala ajanga iba ki kilem nung mi adokba sayuogo.

Ato Kilonser Hristijan Mickoski-i, linük asoshi iba anogo ya tejangshitsü anogo ka, kechiyong lanurtem aika taküm samaogo, ta ashi.

Interior Minister Pance Toskovski-i ashiba agi, mi ya pyrotechnic devices nungi spark ajanga tenzüka liasü.

Kocani police station kima osangbenertem den jembiba mapang pai ashiba agi, spark yagi tsüngbang dak kongshi, koba mi mela mela jangrutsüba oset agi yanglur liasü.

Video ajanga kentenba telok ya sabang nung ken tena

aliba mapang flare ana yok aser iba nungi adokba mi yagi tsüngbang nung kongshi aser mi kanga kara jangrulokyonga aoba sayuogo.

Tsüngbang nung mi adokba ya nüburtemi temseptsü merangba video ajangsa sayuogo. Iba mapang tashi nung club sünga nüburtem liasü aser parnoki mi temsepba repranga liasü.

Arishi küm 20 tain Marija Taseva-i Channel 5 TV dang ashiba agi, nüburtem ajentsü merangba mapang nongtepdang la alang aser nisungtemi la daka ajem tenzüka saka la jenteta liasü.

Kocani indang mozükidangi nisung 90 temang ronger anir arua liasü. Health minister-i ashiba agi nisung 18 temang kanga mejungi lir.

Kocani indang hospital director Kristina Serafimova-i local media dang ashiba agi, ID card maliba ajanga staff temi nüburtem maitsü mejangjateti liasü. Ajisüaka asürtem ya arishi küm 14 nungi 24 tsüngda alirtem liasü ta lai ashi.

Ken o dak sendakba nung nisung ka puogo, ta interior minister-i ashi, ajisüaka pai osang tejangja magütsü.

BLA-i Balochistan nung army convoy ka amak

Islamabad, Metsüremi/March 16 (Agencies): Deobarnü military mena aliba convoy ka amakba sülen Pakistan army personnel 90 tepsetogo, ta Baloch Liberation Army-i ashi.

Ajisüaka Pakistan nunger police officer kati ashiba agi, iba convoy amakba mapang paramilitary sepai pongu dang tepseta liasü.

Iba convoy amakba ya BLA-i nangzükogo aser ashiba agi, parnoki Noshki kübok RCD highway nung Rakshan Mill anasa Pakistan military convoy ka maka liasü.

Iba telungpur telok yagi ashiba agi, convoy nung bus ti densema liasü aser bus rongnung kabo bomb

pokdaksüba mapang ajunga raksa liasü.

BLA-i ashibaagi, parnoki sentong kanga junga yanglur iba convoy amak aser bus nung mena aliba tsükchir 90 tepsetogo.

"Taftan-i (Iran arrtsü nung aliba tesem) oya aliba Convoy nung bus tenet liasü. Noshki nung bomb inoka aliba gari kati bus ka dak atsük," ta Noshki nung police ketdangsür Mohammed Zafar-i AFP dang ashi.

Balochistan chief minister Sarfraz Bugti-i sepaitem amakba ya aitsüogo.

Iba hopta tetenzüklen Mongolbarnü Mashkaf Tunnel anasa Balochistan Liberation Army (BLA)-i

Jaffar Express maka security personnel densema passenger 450 dak tema pur ao.

Iba train ya Quetta, Balochistan nungi Peshawar, Khyber Pakhtunkhwa-i oya aliba mapang telungpurtemi maka liasü.

Iba sülen military-i operation tenzüka aser ghonda aika inyaksangshiba sülen Pakistan military-i ashiba agi parnoki Jaffar Express train hijack asüba telungpurtem ajak tepsetogo aser tanungba nüburtem 300 shi kümzükogo.

Telungpurtem rongnung pei temang nung bomb alenoker pokdaksürtem densema liasü, shirnok sniper temi khaseta liasü.

Yemen nung US fighter jets-i bomb pokloktsü, tanur densema 32 asü

Sanaa, Metsüremi/March 16 (Agencies): US Tir Donald Trump-i Houthi telok dang Red Sea alema aoba rong tem mamaktsü tekum dangtsü shir US fighter jets temi Yemen linük tesem balala nung amakdang nisung 32 asü.

Houthi-i ketdangsüba Health Ministry ajanga tang tesüsa sangdongba nung US-i tayimtsü amshia amakdang nisung 101 yiruogo, ta Sanaa nungi osangbener kati ashi.

Israel-i Gaza mokdangba mechi Red Sea nung Israel den sendaktepa aliba rong tem amaktsü ta Yemen nung aliba Houthis teloki amokmerenba sülen January ita US tir mendeni Trump aruba sülen ibai US mitkar inyakyim tejangjaba aser tesashiba alitsü.

Yemen yimtiba Sanaa aser ano Saada aser al-Bayda tesemtem nung US-i Honibarnü nungi Deobarnep tashi amakdang nisung 32 tepset aser 101 yiru, ta ministry of health ajanga ashi.

Asü-amartem ya timba tanur aser tetsürtem lir, ta ministry of health indang odongtar Anis al-Asbahi-i shia liasü.

Saada nung tila tanur pezü aser tetsür ka asü. Yemeni media ajanga ashiba agi, US sepaitemi Hajjah, Marib, Dhamar aser Taiz province tem nunga amak.

Houthi teloki iba amakba melangzüi metoktsütsü ta tekum dangtsü shiogo.

Trump-i social media post ka nung 'lethal force' tesashi amshitsü nangzük aser Iran dang tekeratiba nung par teyari anentsü totuyuba agütsü.

"Ner mapang temogo, aser nenoki amakba tanü nungi tenzüka anentsüla. Parnoki

yamaji meinyakra, nenoki kodanga mongudangba ama nenok madak molumi tsüktsü," ta US tiri Truth Social nung ashi.

"Ni tanü US mitkar dang Yemen nung Houthi kiralongrar anema military operation tesashi tenzüksü totuyuba agütsüogo, aser asen taginüba matalok tashi Washington-i 'lethal force' amshitsü," ta pai ashi.

Trump-i Iran danga Houthis yariba tangsa anentsüla ta ashi. Iran-i US amokmerenra, America-i khuret ajak ner nem nungloktsütsü aser onok iba atema tajung masütsü, ta shia liasü.

US-i Yemen amakba Iran Foreign Minister Abbas Araghchi-i aitsü aser par foreign policy nung totuyuba agütsütsü Washington dak tashi mali ta ashi. Russian Foreign Minister Sergei Lavrov-i US Secretary of State Marco Rubio dang Honibarnü phone ajanga telok ajaki Yemen nung tashi mamshitsüla ta ashi.

"America nungeri kuli bushia tatem kati arua amshiba atema Sergei Lavrov-i tashi amshiba tangsa anentsü nüngdak ta ashi aser tarutsü nung azüdokshi nokdangtsü asoshi tangatettep kati arutsü asoshi yimtenren tsütsünungi lenmang bushitsü tongtipang ta shiogo," ta Russia indang foreign ministry ajanga Deobarnü ashi.

Gaza Strip-i yokba chiyongtsü, totzü aser danga osettem ajunga Israel-i nokdangba asoshi Yemen linük tuluba amokbanga aliba Houthis temi rong tem amaktsü ta taoba hopta amokmerenaka tang tashi rong kata mamak.

Houthi odongtar

Mohammed Abdul-Salam-i sangdong ka nung, "Bab al-Mandeb Strait nung international navigation asoshi timtem lir ta US tiri jembiba ya tiazü aser mashi lenmangi nüburtem anisaba lir," ta ashi.

"Gaza bhukuma tzüiyim nung senzüsempongba nung tenokdangba agütsütsü Yemen-i sangdongba ya Israel nunger rong tem atema dang lir aser Palestinian resistance aser tsükchir tsüngta ceasefire agreement nung shia aliba ama Gaza nung nüburtem nem teyari magütsü tashi atema lir," ta pai ashi.

Houthis indang political burea-ia sangdong balaka agütsüba nung Yemen amakba ya "war crime" lir ta ashi aser telangzüba agütsütsü nangzük. "Tashiyim amshiba melangzü metoktsütsü. Asen Yemen armed forces-i telangzüba agütsütsü jungjunga renema lir," ta sangdong ajanga ashi.

Sanaa nung alirtemi ashiba agi, Shuayb district nung aliba Geraf kiyong anüdoklen tayimtsü pezü agi amak aser yangji aliba tetsür aser tanurtem aoksadaksü.

Israel-i Gaza nung raraba sülen November 2023 nungi Houthis-i rong dak 100 ben dak tema maka alima ajunga shishilempaba nung kongshi aser US mitkari missiles aser drones raksatsüba nung rongsen jenti lalua liasü.

Israel-i Gaza nung Hamas den raraba mechi Palestine nunger bhukuma amak ta Houthis-i ashir.

Gaza rara tenzüka sülen Israel-i Iran tembar Gaza nung Hamas aser Lebanon nung Hezbollah tashi kanga ajemtsüogo. Ajisüaka Yemen indang Houthis telok ya tang tashi tashi ita lir.

UNDERTAKING

I, Shri. Ally Shimray @ Marshall Shongzanwo son of Shri. Khathing Shimray of Tanrui Village, Police Station- Somdal, District- Ukhrul, State- Manipur have committed a transgressive act against traditional values by insulting Dr. S.C. Jamir, Ao Naga women and the Ao Naga Community through my post in the Facebook group The Patriotic Nagas. I am eternally grateful to the Ao Senden for pardoning me as prayed by me for the wrongs I have committed against them. I hereby predge, in presence of competent witnesses, that I will never commit again such wrong against them in the coming future, but will strive to be a torch bearer of harmony and brotherhood among all communities.

Witnesses:

- (Wungmaso Kasar),
President, Tangkhul Hoho Nagaland.
- (K. Worshim),
Secretary, Tangkhul Hoho Nagaland.
- (James Luram),
President, Tangkhul Union Kohima.

(Ally Shimray @Marshall Shongzanwo)

Special Olympics nung India nunger asayartemi medal 33 angu



Metsüremi/March 16, 2025

(Agencies): Special Olympics World Winter Games tatembangbuba anogo nung India nunger asayartemi kanga junga asaya-a asaya pezü nung medal 12 anguba sülen ajak seneper medal 33 nguogo.

Snowshoeing nung India nunger asayartemi ano medal pezü ngua taoba mapang medal trok ngur aliba nung bendenloktsü. Vasu Tiwari, Shalini Chauhan, aser Tanya nungeri 25m Snowshoeing event nung silver angu aser Jahangir-i kasa asaya nung bronze medal ka ngua liasü.

Alpine Skiing nunga India nunger asayartemi kanga junga asayaogo. Radha Devi aser Nirmala Devi nati

Intermediate Slalom (F01 aser F04 category) nung silver aser Abhishek Kumar-i Novice Slalom (M02 category) ano silver medal ka ngua liasü.

Maneni Akriti-i Cross Country Skiing nung kanga junga asaya-a 100m Classical Technique (F02 category) nung bronze medal ngua liasü.

Floorball event nung India tetsür Traditional Team-i parnok indang teamwork aser tasa tajung sayua bronze medal ngua liasü.

Special Olympics Bharat tir Dr. Mallika Nadda-i, asayartem atema kanga nema adangba lemsatepogo. "Linük nungi asayartemi maneni bendaga agüja tanen makai inyakra takok angutsü atema kecha

tetsükdahtsü mali ta sayuogo. Parnoki anguba medal ajak ya parnoki meranga inyakra aser coach, parnok kibong aser Special Olympics Bharat kibong rangbeni nongita yariba temaitsü lir," ta Nadda-i ashi.

Special Olympics World Winter Games 2025 ya March 15 nü tembangogo. Iba asayamung nung India nunger asayartemi gold 8, silver 18 aser bronze medal 7 ngua ajak senteper medal 33 ngua liasü. India nunger asayartemi Snowshoeing nung medal 10 aser Alpine Skiing nunga medal 10 aser Snowboarding nung medal 6 angu. Track Speed Skating, Cross Country Skiing aser Floorball nung medal 4, 2 aser 1 ngua liasü.

New Zealand-i wicket 9 agi Pakistan kokogo



Metsüremi/March 16, 2025

(Agencies): New Zealand aser Pakistan na Christchurch nung mezüngbuba T20 asaya NZ-i wicket 9 agi kokogo.

Hagley Oval nung Pakistan team mezüng batting amenba sülen parnoki asayar ajak out sür run 91 dang yanglutetogo, koba parnoki New Zealand nung tang tashi nung run ishitiba yangluba asütsü. Pakistan-i yangluba run ya NZ team-i over 9.5 nung dang menepa liasü.

Captain tasenba Salman Agha lenisüba nung Pakistan team mezüngbuba asayaba mapang opener Mohammad Haris aser Hasan Nawaz

naprongla duck nung out asü aser over asem sülen parnoki run asem yanglur asayar asem out sür liasü. Iba sülen over trokbuba tashi nung parnoki run 14 dang yanglutet saka asayarbo pezü out süatok. Parnok rongnungi batter aseme dang run ter dak tema yanglua liasü.

Man of the match Kyle Jamieson-i mezüngbuba wicket pezü nungi asem agi aser pai asaya tepeyong nung run 8 agütsür wicket asem agia liasü. Jacob Duffy-ia run 14 agütsür wicket 4 agia liasü.

Khushdil Shah, shibai ball 30 nung run 32 yanglua liasü, pa

kijai run 18 dak tema yanglua liasü.

Opener Tim Seifert-i ball 29 nung run 44 yanglua New Zealand atema asaya kanga junga tenzühtsü aser iba sülen Finn Allen aser Tim Robinson na senteper run 39 yanglua asaya koka liasü.

Team ana tsünga T20I pongu asayatsü aliba nungi tanabuba asaya ya Dunedin nung Mongolbarnü asaytsü

Taoba mapang Pakistan team-i New Zealand nung T20 asaya nung run ishitiba yanglubaji taoba küm January ita Christchurch nungsa run 92 yangluba liasü.

Indian Super League Playoffs March 29 nü tenzühtsü

Metsüremi/March 16, 2025

(Agencies): Indian Super League (ISL) League stage iba hopta tetenzüklen tembangba sülen ISL-i Honibarnü 2024-25 Playoffs atema anogo sangdongogo.

Knockout asayatem March 29 aser 30 nü asayatsü aser iba sülen April 2, 3, 6 aser 7 nü two-legged semifinals asayatsü.

Taküm ISL final ya April 12 nü asayatsü.

Mohun Bagan SG-i otsü tasen ka yanglua League Shield anabenbuba atonga benogo, koba tang tashi nung team kati danga kokteta mali. Mohun Bagan SG den FC Goa (2nd), Bengaluru FC (3rd), NorthEast United FC (4th), Jamshedpur FC (5th) aser Mumbai City FC (6th) nunger Playoffs atema qualify süogo.

Playoffs nung tastembuba nungi trokbuba tashi nung aliba team tem single-legged knockout asaya ana asayatsü aser iba sülen takoker Mohun Bagan SG aser FC Goa den asayatsü, shirnok semifinals-i indang indanga iogo.

Playoffs nung team anapronglai goal kasa dang idaktsüra asaya ya extra time asayatsü aser iba sülen penalty

asayatsü.

Semifinals ya home aser away format nung asayatsü aser takoker April 12 nü League Table nung temaba jenjang nung aliba team indang home ground nung final asayatsü.

Playoffs mapanglem:

29th March: Knockout 1 - Bengaluru FC (home) vs Mumbai City FC

30th March: Knockout 2 - NorthEast United FC (home) vs Jamshedpur FC

2nd April: Semifinal 1 (First leg) - Winner of Knockout 1 (home) vs FC Goa

3rd April: Semifinal 2 (First leg) - Winner of Knockout 2 (home) vs Mohun Bagan SG

6th April: Semifinal 1 (Second leg) - FC Goa (home) vs Winner of Knockout 1

7th April: Semifinal 2 (Second leg) - Mohun Bagan SG (home) vs Winner of Knockout 2

12th April: Final (Winner of Semifinal 1 vs Winner of Semifinal 2)

Indian Super League ya Jio Hotstar (English, Hindi, Bengali, & Malayalam) aser Star Sports - 3 (English, Hindi, Bengali, & Malayalam), Asianet Plus (Malayalam) nung live sayutsü.

BNP Paribas Open: Draper aser Rune na final asayatsü

Metsüremi/March 16, 2025

(Agencies): Britain nunger Jack Draper-i Honibarnü Indian Wells semifinal asaya nung Spain nunger asayar Carlos Alcaraz 6-1 0-6 6-4 agi koka final tongogo.

Alcaraz ya taküm agi iba asayamung asembenbuba atonga akoktsü atema timla nung asaya liasü.

Draper-i taoba küma Queen's Club nunga world number three asayar ya kokogo aser iba asayamung nung maneni koka pa tang mezüngbuba Masters 1000-level final kati iogo, kong pa Denmark nunger asayar Holger Rune den asayatsü.

Iba asaya masüdag Alcaraz-i set ka nung danga tamakok mongui liasü saka pai tanabuba game nung double fault mena Draper nem break ka agütsü. Iba sülen Draper-i game trokbuba nung ano serve ka break süa mezüngbuba set akok.

Tanabuba set nungbo Alcaraz-i kanga junga asaya Draper nem game ka danga mekokdahtsü asaya akok.

Ajisüaka tasembuba set nung Draper-i Alcaraz indang serve ka break süa asaya 6-4 agi akok aser Alcaraz asaya 16 khien danga tamakok mongui asaya arua aliba tembangdahtsü.

Tanga semifinal asaya ka nung Denmark nunger asayar Holger Rune-i 7-5, 6-4 agi Russia nunger asayar Daniil Medvedev koka Indian Wells ATP Masters final tongogo. Medvedev ya iba asayamung nung küm asembuba final tonga asayatsü liasü.

12 seed asayar Rune ya küm ka tejakdang kasa asayamung quarter-finals nung Medvedev-i tsükdakja liasü. Mezüngbuba set nung tena kati ka indang serve break sütepa kanga toktepa asayaba sülen game 11buba nung Rune-i ano serve break süa asaya akok.

Tanabuba set nunga arishi küm 21 tain Denmark nunger asayar yagi tasembuba game nung Medvedev indang serve break asü aser pa indang serve break mesüdahtsü asayar asayar koka liasü.

BILEMDANGANG

"Tangar den tepela lemsatepra na teti pela alitsü."